



## **Metodologjia ZRRE/Nr.02 /2024**

Në bazë të autoritetit të dhënë sipas nenit 9 paragrafi 1, nënparagrafi 1.7, neni 26, të Ligjit për Rregullatorin e Energjisë Nr. 05/L-084 dhe nenit 23 paragrafi 8. të Ligjit për Energjinë Elektrike Nr. 05/L-085, në seancën e tij mbajtur më 24 dhjetor 2024, miratoi sa vijon:

### **METODOLOGJIA E PËRCAKTIMIT TË TARIFAVE PËR OPERATORIN E EMËRUAR TË TREGUT TË ENERGISË ELEKTRIKE**

#### **KAPITULLI I** **DISPOZITAT E PËRGJITHSHME**

##### **Neni 1** **Fushëveprimi dhe qëllimi**

1. Ky metodologji përcakton:

- 1.1. Bazën dhe procesin për përcaktimin e nivelit të të Hyrave të Lejuara për Operatorin e Emëruar të Tregut të Energjisë Elektrike (NEMO), të cilat mund t'i rikuperojë në cilindo vit përkatës në mënyrë që t'i lejojë atij të mbulojë kostot e arsyeshme të operimit dhe mirëmbajtjes së tregut të energjisë elektrike në përputhje me Ligjin për Energjinë Elektrike;
- 1.2. Parimet dhe proceset me të cilat Tarifatat e NEMO-s do të miratohen, rishikohen dhe rregullohen.

##### **Neni 2** **Përkufizimet**

1. Termat e përdorur në këtë dokument kanë kuptimin e mëposhtëm:

- 1.1. “Të hyrat aktuale të rregulluara” - të hyrat që mbulohen nga NEMO përmes tarifave për ofrimin e shërbimeve NEMO dhe çdo njësi tjetër të të Hyrave të përcaktuara nga Rregullatori, të matura mbi bazën aktuale;
- 1.2. “Plani i Lejuar i Investimeve” - programi i projekteve kapitale për Periudhën Rregulatore të lejuar nga Rregullatori;



- 1.3. “Rregullatori” - nënkupton sipas rastit, Entin Rregullator të Energjisë të Shqipërisë ose Zyrën e Rregullatorit për Energji në Kosovë;
  - 1.4. “Tarifa për Licencë” - shuma e pagueshme sipas kushteve të Tarifave të lëshuara nga Rregullatori;
  - 1.5. “Operator i Tregut (OT)” - person fizik ose juridik, i licencuar nga Rregullatori përgjegjës për operimin dhe organizimin e tregut të energjisë elektrike;
  - 1.6. “Tarifat e Operatorit të Tregut” - tarifat e përcaktuara për detyrimet që paguhen për funksionimin dhe organizimin e tregut të energjisë elektrike, të përcaktuara nga Rregullatori;
  - 1.7. “Të hyrat e lejuara të rregulluara” - të hyrat, të përcaktuara në Shtojcën 1 të kësaj Metodologjie, të cilat mund të rikuperohen në një vit përkatës nga NEMO përmes tarifave;
  - 1.8. “WACC” - Norma e Kostos Mesatare të Ponderuar të Kapitalit mbi asetin bazë të rregulluar e cila do të vlerësohet nga Rregullatori (Shtojca I); dhe,
  - 1.9. “Kapitali i Punës” - fondi i nevojshëm për të përballuar diferencën në kohë midis kryerjes së shpenzimit për sigurimin e shërbimit dhe vjeljes së të hyrave nga klientët gjatë aktivitetit.
2. Termat e tjerë në këtë Metodologji do të kenë kuptimet e përcaktuara në legjislacionin në fuqi për sektorin e energjisë.

## **KAPITULLI II TË HYRAT E RREGULLUARA TË NEMO-S**

### **Neni 3 Parimet e Përgjithshme**

1. Ky rregull bazohet në parimet e mëposhtme:
  - 1.1. Të hyrat e rregulluara të cilat NEMO pret të fitojë nëpërmjet tarifave do të mbulojë kostot e arsyeshme për ofrimin e shërbimeve të autorizuara si Operatorit I Emëruar i Tregut të Energjisë Elektrike, në masën që këto kosto janë të justifikuara dhe të realizuara me kujdes;
  - 1.2. Të hyrat e NEMO përcaktohen në mënyrë transparente dhe të paanshme, bazuar në kritere jodiskriminuese;
  - 1.3. Të hyrat e NEMO sigurojnë qëndrueshmërinë dhe parashikueshmërinë e veprimtarisë së Operatorëve të Tregut;



- 1.4. Të hyrat e NEMO sigurojnë drejtësi dhe ekuilibër ndërmjet interesave të Operatorit të Tregut dhe interesave të përdoruesve të shërbimeve që i ofron Operatori i Tregut;
  - 1.5. Të hyrat dhe tarifat e NEMO synojnë të jenë të parashikueshme dhe të qëndrueshme në masën më të madhe të mundshme; dhe
  - 1.6. Të Hyrat dhe tarifat e NEMO do të caktohen për një periudhë 3 vjeçare, përveç periudhës testuese të referuar në provizionet tranzitore.
2. NEMO do të propozojë tarifat e Operatorit të Tregut (OT) të tilla që të hyrat që ai pret të fitojë nga këto tarifa të jetë brenda kufijve të përcaktuar nga Rregullatori.

#### **Neni 4**

##### **Rishikimet e tarifave dhe periudhat rregulluese**

1. Të hyrat e rregulluara do të përcaktohen në Rishikimin e Tarifave.
2. Periudha Rregulluese për të cilën Tarifat NEMO janë në fuqi është një periudhë 3 vjeçare ku kufijtë e miratuar të të hyrave të rregulluara mbeten në fuqi deri në momentin e Rishikimit të Tarifave të NEMO-s mbështetur në dispozitat e Shtojcës III.
3. Formulatat për llogaritjen e të hyrave të rregulluara të lejuara janë ato të përcaktuar sipas OI të kësaj Metodologjie.
4. Procesi i Rishikimit të Tarifave do të shqyrtohet mbështetur në përcaktimet sipas Shtojcës III të kësaj Metodologjie.

### **KAPITULLI III**

#### **TË HYRAT E LEJUARA TË NEMO-S**

#### **Neni 5**

##### **Parimet e Përgjithshme**

1. Kjo metodologji ka për qëllim vendosjen e parimeve për përcaktimin e të hyrave të rregulluara cilat lejojnë përcaktimin e tarifave të Operatorit të Emëruar të Tregut të Energjisë Elektrike mbështetur në kostot e arsyeshme të aktivitetit të NEMO.
2. Rregullatori do të caktojë normën e Kostos Mesatare të Ponderuar të Kapitalit për NEMO në një nivel që lejon mbulimin e arsyeshëm të kostove kapitale për asetet brenda Bazës së Rregulluar të Aseteve.
3. Të Hyrat e Lejuara do të vendosen në një nivel të tillë që i mundëson NEMO-së të rikuperojë kostot e arsyeshme të ofrimit të shërbimeve që ofron Operatori i Emëruar i Tregut të Energjisë Elektrike, në masën që këto kosto janë të justifikuara.



4. Viti rregullues i të hyrave të lejuara i periudhës rregullatore do të përbëhet:
  - 4.1. Baza e Rregulluar e Aseteve;
  - 4.2. Kostot e lejuara të Operimit dhe Mirëmbajtjes;
  - 4.3. Amortizimi i lejuar;
  - 4.4. Norma e Kostos Mesatare të Ponderuar të Kapitalit;
  - 4.5. Tarifat dhe taksat e licencës;
  - 4.6. Norma e Lejuar e Kapitalit të Punës;
  - 4.7. Të hyrat jo tarifore.
5. Në përcaktimin e kostove të arsyeshme, Rregullatori do t'i referohet, por nuk është i detyruar ose i kufizuar në:
  - 5.1. Informacione ekzistues të periudhave të mëparshme në lidhje me vëllimin, koston dhe cilësinë e shërbimit të NEMO-s;
  - 5.2. Vëllimet e parashikuara, kostot dhe cilësia e shërbimit në lidhje me NEMO; dhe
  - 5.3. Krahasimet me kostot e Operatorëve të Tregut të ngjashëm në Evropë, duke marrë parasysh ngjashmëritë ndërmjet Operatorëve të Tregut dhe NEMO-së.
6. Çdo e hyrë tjetër që nuk mbledhet nëpërmjet tarifave të rregulluara, por që lidhet me ofrimin e shërbimeve të ofruara nga NEMO do të zbritet nga të hyrat e rregulluara të NEMO, duke përfshirë çdo ndryshim midis vlerës së asetëve të nxjerra jashtë përdorimit dhe vlerës së tyre rregullatore.

## **Neni 6**

### **Kostot e lejuara të operimit dhe mirëmbajtjes**

1. Me paraqitjen e vlerësimeve të tij për kostot fikse dhe të tjera të funksionimit dhe mirëmbajtjes që kërkohen për t'u rikuperuar përmes të hyrave të rregulluara të lejuara për çdo periudhë të ardhshme rregullative, NEMO do të kërkojë të rikuperojë vetëm ato pjesë ose elemente të këtyre kostove që mund t'i atribuohen në mënyrë të arsyeshme të aktivitetit të tij.
2. Kostot e lejuara të operimit dhe të mirëmbajtjes do të përfshijnë vetëm proporcionin ose elementet e kostove të korporatës (të çdo njësie ekonomike amë ose çdo njësie ekonomike të lidhur) që mund t'i atribuohet në mënyrë të arsyeshme NEMO-së mbështetur në standardete aplikueshme të kontabilitetit rregullativ.



## **Neni 7**

### **Amortizimi i lejuar**

1. Kostot e lejuara të amortizimit do të llogariten mbështetur në sistemin fiskal për llogaritjen e amortizimit për qëllime të rregullimit.
2. NEMO nuk do të lejohet të mbulojë kostot e amortizimit për asetet e financuara nga grantet kapitale dhe kontributet nga palët e treta.

## **Neni 8**

### **Norma e Kostos Mesatare të Ponderuar të Kapitalit**

1. Norma e Kostos Mesatare të Ponderuar të Kapitalit mbi Asetin Bazë të Rregulluar do të përcaktohet nga Rregullatori mbështetur në *Shtojcën I* të kësaj metodologjie.
2. Vlerat e lejuara të normës së WACC mbi asetin bazë të rregulluar, do të caktohen nga Rregullatori në kuadër të rishikimit të tarifave.
3. Baza e Aseteve të Rregulluara do të përfshijë vetëm asetet të cilat konsiderohen si të shfrytëzuara dhe të dobishme në periudhën e rishikimit të tarifave, duke përjashtuar zhvlerësimin e akumuluar.
4. NEMO nuk do të fitojë kthim mbi asetet e financuara duke përdorur grante kapitale ose kontribute të donatorëve.

## **Neni 9**

### **Norma e Lejuar e Kapitalit të Punës**

1. Të Hyrat e lejuara do të përfshijnë një normë të lejuar të Kapitalit të Punës i cili do të llogarisë kostot afatshkurtra të financimit për të mbuluar diferencën ndërmjet të pagueshmeve dhe të arkëtueshmeve brenda çdo muaji të caktuar.
2. Vlera e Lejuar e Kapitalit të Punës do të llogaritet si  $\frac{1}{12}$  e shpenzimeve operative sipas formulës së mëposhtme:

$$WCLC = 1/12 * (OPMC + LICC)$$

## **Neni 10**

### **Kostot dhe Taksat e Tarifave të Licencës**

1. Rregullatori do të lejojë OT-në të mbulojë të gjitha shpenzimet e licencimit dhe shpenzimet tatimore.



## **KAPITULLI IV TARIFAT E OPERATORIT TË NOMINUAR TË TREGUT TË ENERGJISË ELEKTRIKE**

### **Neni 11 PARIMET E PËRGJITHSHME**

1. NEMO do të propozojë tarifatat NEMO për miratim nga Rregullatori në mënyrë që:
  - 1.1. NEMO mbulon kostot e operatorit të tij të tregut, për ofrimin e shërbimeve të autorizuara sipas NEMO, deri në nivelin e të hyrave të rregulluara të lejuara të përcaktuara sipas kësaj metodologjie; dhe
  - 1.2. Tarifatat NEMO janë në përputhje me një metodologji të zhvilluar nga NEMO dhe të miratuara nga Rregullatori. Metodologjia do të specifikojë si alokohen kostot për funksionet e Operatorit të Tregut dhe se si këto do të mbulohen nga tarifatat.

### **Neni 12 Procesi i miratimit të tarifave NEMO**

1. NEMO do t'i dorëzojë Rregullatorit metodologjinë e tij për Tarifatat NEMO dhe çdo ndryshim të mëvonshëm të kësaj metodologjie të paktën pesëmbëdhjetë (15) ditë pune para datës së propozuar të hyrjes në fuqi.
2. Asnjë metodologji apo ndryshim i metodologjisë nuk do të jetë në fuqi derisa të miratohet nga Rregullatori.
3. NEMO ka të drejtë të propozojë tarifatat NEMO që i nënshtrohen kërkesave të 0më sipër.
4. Tarifatat NEMO do të synojnë të përmbushin kriteret e mëposhtme:
  - 4.1. Të promovojë funksionimin efikas të sektorit dhe përdorimin e shërbimeve të energjisë elektrike për interesat afatgjata të konsumatorëve;
  - 4.2. Struktura tarifore NEMO duhet të jetë e thjeshtë dhe lehtësisht e kuptueshme nga përdoruesit.
  - 4.3. Tarifatat duhet të pasqyrojnë kostot e arsyeshme të NEMO, në masën më të madhe të mundshme.
  - 4.4. Tarifatat duhet të shmangin diskriminimin ndaj një kategorie ose kategorive të anëtarëve.
  - 4.5. Tarifatat duhet të jenë lehtësisht të krahasueshme me strukturat rajonale të tarifave NEMO.



**Neni 13**  
**Amendamenti**

1. Rregullatori ruan të drejtën për të ndryshuar ose modifikuar çdo dispozitë të kësaj Metodologjie.
2. Procedurat për ndryshimin ose modifikimin e kësaj Metodologjie do të jenë të njëjta si për miratimin e saj.

**Neni 14**  
**Dispozitat Tranzitore**


1. Kjo metodologji do të jetë e aplikueshme dhe do të shërbejë për përcaktimin e tarifave të Operatorit të Emëruar të Tregut të Energjisë Elektrike (NEMO) për periudhën tarifore të vitit 2026 e në vazhdim.
2. Viti 2025 do të jetë një vit 'testimi' i cili do të shërbejë për vlerësimin e kostove faktike të realizuara prej NEMO. Për vitin e testimit Rregullatorët do të shqyrtojnë propozimin e tarifave nga NEMO mbështetur në argumente dhe sqarime si dhe në një *benchmark* me qëllim krahasimin e tarifave të propozuara me NEMO-t e tjera rajonale.


**Neni 15**  
**Hyrja në fuqi**


1. Kjo Rregull hyn në fuqi me miratimin e saj nga Bordi i ZRRE-së dhe do të publikohet në faqen zyrtare të ZRRE-së.

**Bordi i Zyrës së Rregullatorit për Energji:**

  
\_\_\_\_\_  
Ymer Fejzullahu, Kryetar

  
\_\_\_\_\_  
Lutfije Dervishi, Anëtare

  
\_\_\_\_\_  
Gani Buçaj, Anëtar

  
\_\_\_\_\_  
Artan Isufi, Anëtare

  
\_\_\_\_\_  
Adnan Preniqi, Anëtar



## SHTOJCA I LLOGARITJA E TË HYRAVE TË RREGULLUARA TË LEJUARA TË NEMO-S

1. Kjo shtojcë përcakton formulat për llogaritjen e të hyrave të lejuara të rregulluara të NEMO. Kjo shtojcë ka për qëllim të plotësojë dhe qartësojë zbatimin e parimeve të përcaktuara në pjesën kryesore të Rregullave.
2. Të hyrat e rregulluara të lejuara NEMO (NEMORR) do të llogariten në Rishikimet Tarifore duke përdorur formulën e mëposhtme:

$$NEMORR = (RAB * WACC) + (OPMC + DEPC + WCLC + LICC - NTFR)$$

*Ku janë:*

<i>NEMORR</i>	<i>Të hyrat e lejuara të NEMO</i>
<i>RAB</i>	<i>Baza e rregulluar e aseteve</i>
<i>WACC</i>	<i>Kosto mesatare e ponderuar e kapitalit</i>
<i>OPMC</i>	<i>Kostot e lejuara të operimit dhe mirëmbajtjes</i>
<i>DEPC</i>	<i>Kostot e lejuara të amortizimit</i>
<i>WCLC</i>	<i>Kapitali i Punës</i>
<i>LICC</i>	<i>Tarifa dhe taksat e licencës</i>
<i>NTFR</i>	<i>Të hyrat jo-tarifore</i>

3. Norma e 'Kostos Mesatare të Ponderuar të Kapitalit - WACC' mbi bazën e rregulluar të aseteve neto do të përlllogaritet sipas formulës në vijim:

$$WACC = [ ES * AroE / (1-T) ] + (DS * CoD)$$

$$ES + DS = 1$$

*Ku janë:*

<i>ES</i>	<i>Objektivi për raportin e kapitalit të vet në RAB</i>
<i>T</i>	<i>Norma e taksës së korporatës</i>
<i>ARoE</i>	<i>Norma e lejuar e kthimit mbi kapitalin e vet pas takse</i>





*DS*

*Objektivi për raportin e borxhit në RAB*

*CoD*

*Kosto e borxhit*

Rregullatori do të vlerësojë normën e propozuar të Kostos Mesatare të Ponderuar të Kapitalit të paraqitur nga NEMO krahas normave të tregut lidhur me kthimin e kapitalit dhe koston e borxhit si dhe duke konsideruar krahasim me shoqëri të tjera që kanë risk të njëjtë, historinë si dhe kushtet aktuale financiare dhe ekonomike të NEMO.



## **SHTOJCA II**

### **BAZA E ASETEVE TË RREGULLUARA**

1. Kjo shtojcë përshkruan përcaktimin e bazës së asetëve të rregulluara me qëllim të llogaritjes së amortizimit të lejuar dhe ( 0).
2. Baza e Aseteve të Rregulluara do të jetë një vlerë rregullative e pasurive të paluajjtshme të përdorura dhe të dobishme të NEMO-së që janë të nevojshme për ofrimin e Shërbimeve të saj. Baza e asetëve të rregulluara do të bëjë dallimin ndërmjet klasave të ndryshme të asetëve.
3. Rregullatori do të përcaktojë Bazën e Aseteve të Rregulluara para fillimit të Periudhës së parë Rregullative.
4. Baza e Aseteve të Rregulluara do të përditësohet në çdo Rishikim Tarifor si më poshtë:
  - 4.1. Kostot e lejuara të amortizimit gjatë periudhës aktuale rregullative do të zbriten nga baza rregullative e asetëve, e llogaritur sipas politikave përkatëse;
  - 4.2. Shitjet ose nxjerrjet jashtë përdorimit të asetëve gjatë periudhës aktuale rregullative do të zbriten nga baza e asetëve të rregulluara në vlerën e tyre të mbetur;
  - 4.3. Baza e Aseteve të Rregulluara nuk përfshin asetet e financuara nga grantet dhe kontributet e palëve të treta;
  - 4.4. Shpenzimet kapitale gjatë periudhës aktuale rregullative do t'i shtohen bazës së asetëve të rregulluara gjatë Rishikimit të parë Tarifor pas datës kur asetë është futur në shërbim dhe me koston e lejuar në planin e lejuar të investimeve. Interesi gjatë ndërtimit do të kapitalizohet. Në Rishikimin e Tarifave, i licencuari mund të kërkojë që kostoja aktuale dhe jo ajo e lejuar e një investimi të shtohet në Bazën e Aseteve të Rregulluara. Rregullatori do ta pranojë kërkesën nëse i licencuari mund të demonstrojë qartë se dallimi në mes të kostove të lejuara dhe atyre aktuale është për shkak të faktorëve jashtë kontrollit të të licencuarit dhe se janë bërë përpjekjet e tij më të mira për të minimizuar rritjet e kostos;
  - 4.5. Nëse një projekt kapital në Planin e Investimeve të Lejuara nuk vihet në shërbim në Periudhën Rregullative aktuale, kostoja e tij e lejuar nuk do t'i shtohet bazës së asetëve të rregulluara në Rishikimin e ardhshëm Tarifor;



- 4.6. Kur ndonjë kosto e mirëmbajtjes është e përfshirë ose është përfshirë më parë në kostot e lejuara operative, nuk do të kapitalizohet, as nuk do të përfshihet në bazën e asetëve të rregulluara;
  - 4.7. Baza e Rregulluar e Asetëve do të rregullohet duke marrë parasysh normën e inflacionit gjatë periudhës së mëparshme rregullatore, duke përdorur Indekset e Harmonizuara të Çmimeve të Konsumit - Të gjithë njësitë për Eurozonën të publikuar nga Eurostat si masë përkatëse; dhe,
  - 4.8. Politikat e amortizimit, të përcaktuara nga ZRRE, në lidhje me jetëgjatësinë e asetëve do të zbatohen në mënyrë të vazhdueshme dhe konsistente dhe nuk do të ndryshohen nga i licencuari për qëllime rregullative.
5. Jetëgjatësia e Asetëve Ekonomike për klasa të ndryshme të asetëve do të përdoret për të llogaritur zhvlerësimin në bazën e asetëve të rregulluara. Jetëgjatësia e Asetëve Ekonomike do të përcaktohet në Rishikimet e të Hyrave të Rregulluara në mënyrë që ato të pasqyrojnë jetëgjatësinë teknike të asetëve, përveç rasteve kur ka arsye të demonstrueshme se pse jetëgjatësia teknike e një asemi do të ndryshojë nga jetëgjatësia e dobishme ekonomike e një asemi.
6. Shpenzimet e lejuara kapitale do të përcaktohen në Rishikimet e Tarifave bazuar në Planin e Lejuar të Investimeve. Plani i Lejuar i Investimeve do të:
    - 6.1. Përfshijë projektet kapitale të nevojshme në mënyrë të arsyeshme për të ofruar Shërbime të Operatori të Emëruar të Tregut të Energjisë Elektrike;
    - 6.2. Identifikojë ndonjë projekt kapital të renditur sipas prioritetit;
    - 6.3. Zhvillohet duke përdorur një analizë të kostove dhe përfitimeve të zbritura të projektit kapital.
7. Plani i Investimeve të Lejuara do të zbatohet si më poshtë:
    - 7.1. NEMO do të bëjë të gjitha përpjekjet e arsyeshme për të siguruar zbatimin e Planit të Investimeve të Lejuara në përputhje me afatet e lejuara;
    - 7.2. Nëse NEMO do të jetë ose nuk është në gjendje që, për arsye jashtë kontrollit të tij, të ndërmarrë një projekt kapital në përputhje me orarin e dhënë në Planin e Investimeve të Lejuara, ai do të njoftojë Rregullatorin. NEMO do të ofrojë detaje gjithashtu për arsyet e vonësës dhe orarin e rishikuar;
    - 7.3. NEMO në çdo kohë mund të aplikojë tek Rregullatori për të zëvendësuar një projekt kapital alternativ me një projekt tjetër kapital në Planin e tij të Lejuar të Investimeve për



aq kohë sa projekti alternativ pritet të rezultojë në përfitime neto të njëjta ose më të mëdha për konsumatorët (duke marrë parasysh rezultatet dhe kostot e pritshme). Nëse Rregullatori njih zëvendësimin, projekti alternativ do t'i shtohet Bazës së Rregulluar të Aseteve në Rishikimin e ardhshëm periodik të përcaktimit të tarifave të Operatorit të Emëruar të Tregut të Energjisë Elektrike; dhe

- 7.4. Nëse NEMO zëvendëson një projekt kapital alternativ me një projekt tjetër kapital në Planin e tij të Investimeve të Lejuar, pa vënien paraprakisht në dijeni Rregullatorin, atëherë Rregullatori do të vlerësojë nëse do ta njohë zëvendësimin e tij në Rishikimin e ardhshëm të të Ardhurave të Rregulluara gjatë procesit të përcaktimit të tarifave të NEMO, por nuk është i detyruar ta pranojë këtë zëvendësim;
- 7.5. Në çdo rast Plani i Investimeve do të përcillet bashkë me Aplikimin për përcaktimin e Tarifave për Operatorin e Emëruar të Tregut të Energjisë Elektrike (NEMO) si pjesë përbërëse e shpenzimeve kapitale të parashikuara që do të shërbejnë për përlogaritjen e të ardhurave të rregulluara mbështetur në përcaktimet e kësaj Metodologjie.



### **SHTOJCA III**

#### **PROCESI I RISHIKIMIT TË TARIFAVE**

1. Rregullatori, me qëllim të promovimit të transparencës, do të publikojë aplikimin për përcaktimin e tarifave, materialet, dokumentacionin plotësues të dërguar nga NEMO si dhe komentet nga palët interesuara në lidhje me aplikimin në faqen e tij zyrtare, duke përjashtuar vetëm informacionet e cilësuara si konfidenciale.
2. Kërkesa për Rishikim të Tarifave mund të iniciohet përmes një apo më tepër proceseve në vijim:
  - 2.1. Inicimi nga Rregullatori i Shqyrtimit Periodik pas përfundimit të çdo periudhe tarifore 3 vjeçare;
  - 2.2. Inicimi nga Rregullatori apo NEMO si pasojë e ndonjë ndryshimi të rëndësishëm në rrethanat që ekzistonin në kohën e miratimit të të Ardhurave të Lejuara.
3. Me pranimin e kërkesës nga paragrafi 2 i kësaj Shtojce, ose nëse kompania nuk paraqet kërkesë tek Rregullatori për uljen e të Hyrave të Lejuara, në kushtet e paraqitjes së rasteve nga paragrafi (2) i këtij neni, Rregullatori miraton një vendim për fillimin e procedurës për Rishikimin e të Hyrave të Lejuara dhe ia dorëzon NEMO-së.
4. Afatet për procesin e përgjithshëm të Rishikimit do të përcaktohet nga Rregullatori gjatë fillimit të procesit të Rishikimit.
5. Rregullatori do të iniciojë Rishikimin e Tarifave duke njoftuar NEMO-në për:
  - 5.1. Të dhënat për vitet aktuale dhe të parashikuara, sipas kërkesës;
  - 5.2. Formatin në të cilin kërkohet të dorëzohen të dhënat;
  - 5.3. Afatin për dorëzimin e Propozimit të NEMO-së për të Ardhurat e Lejuara për periudhën e ardhshme rregullatore.
6. Propozimi i NEMO-s do të përmbajë informacionin e mëposhtëm dhe do të adresojë çështjet e mëposhtme (pa kufizim):
  - 6.1. Të Hyrat aktuale të rregulluara dhe norma aktuale e kthimit nga investimet e fituara gjatë vitit të fundit rregullator dhe vitit të kaluar rregullator;



- 6.2. Kostot aktuale të ofrimit të Shërbimeve të NEMO-së gjatë periudhës aktuale rregullatore, në përputhje me përkufizimin e kostove që janë përdorur për llogaritjen e të Hyrave të Lejuara;
  - 6.3. Raportin e auditimit dhe pasqyrat financiare të audituara për çdo vit financiar që ka përfunduar në Periudhën Rregullatore aktuale, kur këto janë të disponueshme, siç kërkohet nga kërkesat raportuese të përfshira në licencat e OT-së;
  - 6.4. Kërkesa aktuale për anëtarësim dhe totali i Anëtarëve të Bursës gjatë periudhës aktuale rregullatore;
  - 6.5. Parashikimi i Kërkesës dhe Anëtarësimet e pritshme për Periudhën e ardhshme Rregullatore;
  - 6.6. Parashikimi i të Hyrave Maksimale të Lejuara, duke raportuar secilin nga komponentët e kostos së lejuar veçmas, për Periudhën e ardhshme Rregullatore;
  - 6.7. Çdo studim i porositur nga OT në lidhje me ndonjë nga çështjet që do të përfshihen në Propozimin e NEMO-së; dhe
  - 6.8. Çdo material tjetër shtesë që Rregullatori e konsideron të arsyeshëm se duhet të përfshihet në propozimin e NEMO-së, për sa kohë që Rregullatori ka njoftuar NEMO-në një kohë të arsyeshme para afatit përfundimtar për propozimin e NEMO-së.
  - 6.9. Të hyrat e realizuara nga tarifat NEMO mbi/nën nga ato të lejuara të cilat do të korrigjohen në periudhën pasardhëse rregullatore.
7. Në përgatitjen e propozimit të tij, NEMO, për sa është e mundshme, do të zbatojë parimet dhe formulat e përcaktuara në këtë Metodologji.
  8. Në rastet kur NEMO nuk ka zbatuar parimet dhe formulat, në përputhje me këtë Metodologji, NEMO do të zbulojë çdo fushë ku nuk i ka zbatuar këto parime, arsyen e moszbatimit të tyre, arsyet që mbështesin qasjen alternative dhe të japë një vlerësim të ndikimit të përdorimit të qasjes alternative.
  9. Pas marrjes së propozimit të NEMO-së, Rregullatori do të përcaktojë saktësinë, rëndësinë dhe arsyeshmërinë e tij duke zbatuar metodologjinë e përcaktuar dhe duke përfshirë përcaktimin nëse të Hyrat e Lejuara të propozuara reflektojnë kostot e arsyeshme të ofrimit të shërbimeve të NEMO-s.



10. Rregullatori do të përgatisë një Vlerësim të Përkohshëm të Propozimit të NEMO-së brenda një kohe të arsyeshme (të përcaktuar në paragrafin 4 të kësaj Shtojce) pas shqyrtimit të propozimeve të NEMO-së dhe konsultimit me NEMO-në. Vlerësimi i Përkohshëm do të përcaktojë propozimet e Rregullatorit për të ardhurat e lejuara që do të rikuperohen nga NEMO gjatë periudhës rregullatore dhe arsyetimin për këto. Rregullatori, në përgatitjen e vlerësimit të tij të përkohshëm, mund të ndryshojë, heqë ose zëvendësojë çdo pjesë të Propozimit të NEMO-së ,ashtu si e konsideron të përshtatshme, me kusht që të identifikojë ndryshime, heqje ose zëvendësime të tilla dhe të japë arsyetim për ato.
11. Procesi i shqyrtimit të aplikimit për përcaktimin e tarifave për Operatorin e Emëruar të Tregut të Energjisë Elektrike do të kryhet mbështetur në legjislacion në fuqi.
12. NEMO mund të ankimojë vendimin e Rregullatorit lidhur me përcaktimin e tarifave për Operatorin e Emëruar të Tregut të Energjisë Elektrike në përputhje me legjislacionin në fuqi.